

I. DISPOSICIÓN XERAIS

MINISTERIO DA PRESIDENCIA

12693 Orde PRE/2476/2015, do 20 de novembro, pola que se actualiza a Instrución técnica complementaria número 10 «Prevención de accidentes graves» do Regulamento de explosivos, aprobado polo Real decreto 230/1998, do 16 de febreiro.

O Regulamento de explosivos, aprobado polo Real decreto 230/1998, do 16 de febreiro, regula a prevención daqueles accidentes en que interveñan materias regulamentadas, así como a limitación das súas repercusións nas persoas e no ambiente, e remítese á Instrución técnica complementaria número 10. O dito real decreto incorporou ao noso ordenamento xurídico a Directiva 96/82/CE do Consello, do 9 de decembro de 1996, relativa ao control dos riscos inherentes aos accidentes graves en que interveñan substancias perigosas, así como as súas modificacións mediante a Directiva 2003/105/CE do Parlamento e do Consello, do 16 de decembro de 2003, no ámbito dos explosivos.

Posteriormente foi aprobada a Directiva 2012/18/UE do Parlamento Europeo e do Consello, do 4 de xullo de 2012, relativa ao control dos riscos inherentes aos accidentes graves en que interveñan substancias perigosas e pola que se modifica e ulteriormente se derroga a Directiva 96/82/CE.

Esta nova Directiva 2012/18/UE do Parlamento Europeo e do Consello, do 4 de xullo de 2012, require, para a súa incorporación ao noso ordenamento xurídico no ámbito de aplicación das substancias reguladas polo Regulamento de explosivos, a actualización da Instrución técnica complementaria número 10 «Prevención de accidentes graves».

A disposición derradeira primeira do Real decreto 230/1998, do 16 de febreiro, autoriza os ministerios do Interior e de Industria e Enerxía (na actualidade Ministerio de Industria, Enerxía e Turismo) para actualizar os contidos técnicos das instrucións técnicas complementarias e as especificacións técnicas, tendo en conta a evolución da técnica e o que dispoñan as normas legais e regulamentarias que se diten sobre as materias a que aquelas se refiren.

Esta orde dá cumprimento ao disposto na Directiva 2012/18/UE do Parlamento Europeo e do Consello, do 4 de xullo de 2012, mediante a actualización das disposicións contidas na Instrución técnica complementaria número 10 «Prevención de accidentes graves» do Regulamento de explosivos, salvo no relativo á planificación de emerxencia exterior, que se rexerá polo disposto no artigo 13 do Real decreto 840/2015, do 21 de setembro, polo que se aproban medidas de control dos riscos inherentes aos accidentes graves en que interveñan substancias perigosas.

No relativo á planificación do uso do solo, á información ao público afectado, á consulta e participación pública en proxectos de obras nas inmediacións dos establecementos e á rápida notificación de accidentes, tamén será de aplicación o disposto nos artigos 14, 15.2.a), 16 e 17.1, respectivamente, do Real decreto 840/2015, do 21 de setembro, polo que se aproban medidas de control dos riscos inherentes aos accidentes graves en que interveñan substancias perigosas.

Por último, cabe sinalar que a incorporación da Directiva 2012/18/UE do Parlamento Europeo e do Consello, do 4 de xullo de 2012, ao noso ordenamento xurídico no ámbito da pirotecnia e a cartuchería, para os aspectos non regulados no Real decreto 840/2015, do 21 de setembro, realizarase mediante a actualización das disposicións contidas na Instrución técnica complementaria número 10 «Prevención de accidentes graves» do Regulamento de artigos pirotécnicos e cartuchería.

Sobre esta orde emitiu informe favorable o Pleno da Comisión Nacional de Protección Civil, na súa reunión do 20 de outubro de 2014, e a Comisión Interministerial Permanente de Armas e Explosivos, na súa reunión do 27 de maio de 2015. Así mesmo, emitiu informe

favorable a Secretaría Xeral Técnica do Ministerio do Interior, para os efectos do artigo 24.2 da Lei 50/1997, do 27 de novembro, do Goberno, así como a Secretaría Xeral Técnica do Ministerio de Industria, Enerxía e Turismo.

As medidas incluídas nesta orde non poderán supor incremento de dotacións nin de retribucións nin doutros gastos de persoal, de conformidade coa disposición adicional vixésimo cuarta «Limitación do gasto na Administración xeral do Estado» da Lei 36/2014, do 26 de decembro, de orzamentos xerais do Estado para o ano 2015.

Igualmente, foi sometida ao preceptivo trámite de audiencia, de acordo co previsto no artigo 24.1 c) da Lei 50/1997, do 27 de novembro.

Esta orde dítase ao abeiro do artigo 149.1.26.^a da Constitución, que lle atribúe ao Estado a competencia exclusiva sobre o réxime de produción, o comercio, a tenza e o uso de armas e explosivos.

Na súa virtude, por proposta dos ministros de Industria, Enerxía e Turismo e do Interior, coa aprobación previa do ministro de Facenda e Administracións Públicas, de acordo co Consello de Estado, dispoño:

Artigo único. *Actualización da Instrución técnica complementaria número 10 «Prevención de accidentes graves» do Regulamento de explosivos, aprobado polo Real decreto 230/1998, do 16 de febreiro.*

A Instrución técnica complementaria número 10 «Prevención de accidentes graves» do Regulamento de explosivos, aprobado polo Real decreto 230/1998, do 16 de febreiro, queda redactada do xeito que se insire a seguir:

INSTRUCCIÓN TÉCNICA COMPLEMENTARIA NÚMERO 10

Prevención de accidentes graves

1. Obxecto

Esta instrución técnica complementaria ten por obxecto a prevención de accidentes graves en que interveñan os produtos regulados polo Regulamento de explosivos, aprobado polo Real decreto 230/1998, do 16 de febreiro, así como a limitación das súas consecuencias sobre a saúde humana, os bens e o ambiente, de conformidade co establecido na Directiva 2012/18/UE do Parlamento Europeo e do Consello, do 4 de xullo de 2012, relativa ao control dos riscos inherentes aos accidentes graves en que interveñan substancias perigosas.

2. Ámbito de aplicación

1. Esta instrución técnica complementaria aplicarase ás fábricas, ás instalacións e aos depósitos de materias regulamentadas en que se pode orixinar un accidente grave.

En concreto, esta instrución técnica complementaria será de aplicación cando as cantidades máximas das substancias explosivas que estean presentes no establecemento ou poidan estalo, nun momento dado, superen os limiares seguintes:

Substancias perigosas seleccionadas e categorías de perigo, de conformidade co Regulamento (CE) n.º 1272/2008 do Parlamento Europeo e do Consello, do 16 de decembro de 2008, sobre clasificación, etiquetaxe e envasado de substancias e mesturas	Limiar (toneladas)	
	I	II
1. Nitrato amónico (véxase a nota 1)	350	2.500
2. P1b explosivos (véxase a nota 2)	50	200
Explosivos da división 1.4 (véxase a nota 3)		

Substancias perigosas seleccionadas e categorías de perigo, de conformidade co Regulamento (CE) n.º 1272/2008 do Parlamento Europeo e do Consello, do 16 de decembro de 2008, sobre clasificación, etiquetaxe e envasado de substancias e mesturas	Limiar (toneladas)	
	I	II
3. P1a explosivos (véxase a nota 2)..... – Explosivos inestables ou – Explosivos das divisións 1.1, 1.2, 1.3, 1.5 ou 1.6 – Substancias ou mesturas que teñan propiedades explosivas de acordo co método A.14 do Regulamento (CE) n.º 440/2008 do Parlamento Europeo e do Consello, do 16 de decembro de 2008 (véxase nota 9), e non pertencen ás clases de perigo «peróxidos orgánicos» ou «substancias ou mesturas que reaccionan espontaneamente».	10	50

No caso dun establecemento en que non estea presente ningunha substancia ou preparado en cantidade igual ou superior á cantidade limiar correspondente, aplicarase a seguinte regra para determinar se son aplicables ao dito establecemento os requisitos pertinentes desta instrución técnica complementaria. Se a suma:

$$q_1/Q_1 + q_2/Q_2 + q_3/Q_3 + q_4/Q_4 + q_5/Q_5 + \dots \text{ é igual ou maior que } 1$$

Onde,

q_x = á cantidade da substancia perigosa ou categoría de substancias perigosas x prevista.

Q_x = á cantidade limiar I ou II pertinente para a substancia ou categoría x.

Esta regra utilizarase para avaliar os perigos físicos. Por tanto, incorporará tamén as seguintes substancias recollidas no anexo I do Real decreto 840/2015, do 21 de setembro, polo que se aproban medidas de control dos riscos inherentes aos accidentes graves en que interveñan substancias perigosas:

As substancias perigosas enumeradas na parte 2 consistentes en gases inflamables, aerosois inflamables, gases comburentes, líquidos inflamables, substancias e mesturas perigosas que reaccionan espontaneamente, peróxidos orgánicos, líquidos e sólidos pirofóricos, líquidos e sólidos comburentes, ademais das substancias incluídas na sección P, subseccións P2 á P8, da parte 1.

Nota (1) Nitrato amónico (350/2 500): calidade técnica.

Aplícase ao nitrato de amonio e ás mesturas de nitrato de amonio cuxo contido de nitróxeno debido ao nitrato de amonio represente:

- Entre o 24,5% e o 28% en peso, e que conteñan como máximo un 0,4% de substancias combustibles,
- Máis do 28% en peso e que conteñan como máximo un 0,2% de substancias combustibles.

Aplícase tamén ás solucións acuosas de nitrato de amonio cuxa concentración de nitrato de amonio supere o 80%.

Nota (2) A clase de perigo «explosivos» inclúe os artigos explosivos [véxase a sección 2.1 do anexo I do Regulamento (CE) n.º 1272/2008]. Se se coñece a cantidade de substancia ou mestura explosiva que contén o artigo, esa cantidade será a considerada para os efectos desta instrución técnica complementaria. Se non se coñece a cantidade de substancia ou mestura explosiva que contén o artigo, tratarase todo o artigo, para os efectos desta instrución técnica complementaria, como explosivo.

Nota (3) Se os explosivos da división 1.4 están sen envasar ou reenvasados, serán asignados á subsección P1a, non sendo que se demostre que o perigo segue correspondendo á división 1.4, de conformidade co Regulamento (CE) n.º 1272/2008.

Nota (4) As substancias e mesturas clasifícanse de acordo co Regulamento (CE) n.º 1272/2008.

Nota (5) As mesturas trátanse do mesmo xeito ca as substancias puras sempre que se axusten aos límites de concentración establecidos conforme as súas propiedades segundo o Regulamento (CE) n.º 1272/2008, ou a súa última adaptación ao progreso técnico, non sendo que se indique especificamente unha composición porcentual ou outra descrición.

Nota (6) As cantidades que se indicaron anteriormente como limiar refírense a cada establecemento.

As cantidades que hai que ter en conta para a aplicación dos artigos pertinentes son as máximas que estean presentes, ou poidan estalo, nun momento dado. Para o cálculo da cantidade total presente non se terán en conta as substancias perigosas existentes nun establecemento unicamente nunha cantidade igual ou inferior ao 2% da cantidade indicada como limiar, se a súa situación dentro do establecemento é tal que non pode chegar a provocar un accidente grave en ningún outro lugar do establecemento.

Nota (7) Cando se trate de substancias perigosas que non estean cubertas polo Regulamento (CE) n.º 1272/2008, incluídos os residuos, pero que estean presentes, ou poidan estalo, nun establecemento e posúan ou poidan posuír, nas condicións do establecemento, propiedades equivalentes que poidan orixinar accidentes graves, asignaranse provisionalmente á categoría ou substancia perigosa seleccionada máis análoga que entre no ámbito de aplicación desta instrución técnica complementaria.

Nota (8) Cando se trate de substancias perigosas cuxas propiedades permitan clasificalas de máis dun modo, aplicaranse as cantidades limiar máis baixas para os efectos desta instrución técnica complementaria. Non obstante, para a aplicación da regra da nota 4 utilizarase a cantidade limiar máis baixa para cada grupo de categorías aplicable á clasificación correspondente.

Nota (9) Só é necesario realizar ensaios das propiedades explosivas das substancias e das mesturas se no procedemento de detección segundo o apéndice 6, parte 3, das recomendacións de Nacións Unidas relativas ao transporte de mercadorías perigosas, probas e criterios («Manual de probas e criterios das Nacións Unidas») (1) se encontra que a substancia ou a mestura pode ter propiedades explosivas.

(1) Máis orientación sobre os casos en que non é necesario realizar os ensaios pode atoparse na descrición do método A.14, véxase o Regulamento (CE) n.º 440/2008 da Comisión, do 30 de maio de 2008, polo que se establecen métodos de ensaio de acordo co Regulamento (CE) n.º 1907/2006 do Parlamento Europeo e do Consello, relativo ao rexistro, á avaliación, á autorización e á restrición das substancias e dos preparados químicos (REACH) (DO L 142, do 31.5.2008, páx. 1).

2. Para efectos desta instrución técnica complementaria, entenderase por presenza de substancias perigosas a súa presenza actual ou anticipada no establecemento ou a súa aparición, que puidese, se é o caso, xerarse a consecuencia da perda de control dos procesos, incluídas as actividades de almacenamento en calquera instalación no interior dun establecemento, en cantidades iguais ou superiores ás cantidades limiar indicadas neste punto.

3. Esta instrución técnica complementaria non será de aplicación ao transporte de materia regulamentada nin ao almacenamento temporal intermedio directamente relacionado con el, por estrada, ferrocarril, vía navegable interior e marítima ou aérea, incluídas as actividades de carga e descarga e o traslado desde e cara a outro tipo de transporte con destino a peiraos, embarcadoiros ou estacións ferroviarias de clasificación fóra dos establecementos a que se refire esta instrución técnica complementaria.

3. Definicións

Para os efectos desta instrución técnica complementaria, entenderase por:

1) Accidente grave: calquera suceso, como unha emisión en forma de fuga ou vertedura, un incendio ou unha explosión importantes, que resulte dun proceso non controlado durante o funcionamento de calquera establecemento ao cal sexa de aplicación esta instrución técnica complementaria, que supoña un risco grave, inmediato ou diferido para a saúde humana, os bens ou o ambiente, dentro ou fóra do establecemento e no cal interveñan unha ou varias substancias explosivas e/ou perigosas.

2) Almacenamento: a presenza dunha cantidade determinada de substancias perigosas con fins de almacenaxe, depósito en custodia ou reserva.

3) Efecto dominó: a concatenación de efectos que multiplica as consecuencias, debido a que os fenómenos perigosos poden afectar, ademais dos elementos vulnerables exteriores, outros recipientes, canalizacións ou equipamentos do mesmo establecemento ou doutros establecementos próximos, de tal maneira que se produza unha nova fuga, incendio, explosión ou estoupido neles que xere pola súa vez novos fenómenos perigosos.

4) Establecemento: a totalidade do lugar baixo o control dun industrial no cal se encontren substancias perigosas nunha ou varias instalacións, incluídas as infraestruturas ou actividades comúns ou conexas. Os establecementos serán de nivel I ou de nivel II:

4.1 Establecemento de nivel I: un establecemento no cal a cantidade máxima presente de materia regulamentada sexa igual ou superior á especificada no limiar I, pero inferior á cantidade indicada no limiar II.

4.2 Establecemento de nivel II: un establecemento no cal a cantidade máxima presente de materia regulamentada sexa superior á cantidade indicada no limiar II. Todo iso empregando, cando sexa aplicable, a regra da suma da nota 4 do punto anterior.

5) Establecemento existente: un establecemento que ata a data de entrada en vigor desta instrución estea incluído no ámbito de aplicación da Instrución técnica complementaria número 10 do Regulamento de explosivos, aprobado polo Real decreto 230/1998, do 16 de febreiro, e que a partir da data de entrada en vigor quede incluído no ámbito de aplicación desta instrución sen cambiar a súa clasificación como establecemento de nivel I ou establecemento de nivel II.

6) Establecemento novo:

a) Un establecemento que entre en funcionamento ou se constrúa a partir da data de entrada en vigor desta instrución, ou

b) Unha localización operativa que quede incluída no ámbito de aplicación desta instrución técnica complementaria ou un establecemento de nivel I que pase a ser un establecemento de nivel II ou viceversa a partir da data de entrada en vigor desta instrución, debido a modificacións nas súas instalacións ou a actividades que dean lugar a un cambio do seu inventario de substancias perigosas.

7) Establecemento veciño: un establecemento cuxa proximidade a outro establecemento aumenta o risco ou as consecuencias dun accidente grave.

8) Outro establecemento: unha localización operativa que queda incluída no ámbito de aplicación desta instrución técnica complementaria ou un establecemento de nivel I que pasa a ser un establecemento de nivel II ou viceversa a partir da data de entrada en vigor desta instrución inclusive, por motivos distintos dos mencionados no punto 1.

9) Industrial: calquera persoa física ou xurídica que explota ou controla unha fábrica, instalación ou depósito de explosivos, ou dispoña do poder económico ou decisorio determinante sobre a explotación técnica do establecemento, instalación ou depósito.

10) Inspección: toda acción, incluídas as visitas *in situ*, os controis das medidas internas, os sistemas, informes e documentos de seguimento e calquera comprobación posterior necesaria, levados a cabo polo órgano competente ou no seu nome, co obxecto de revisar e promover o cumprimento dos establecementos cos requisitos desta instrución técnica complementaria.

11) Instalación: unha unidade técnica no interior dun establecemento, con independencia de se se encontra a nivel de chan ou baixo terra, na cal se producen, utilizan, manipulan ou almacenan substancias perigosas; incluíndo todos os equipamentos,

estruturas, canalizacións, maquinaria, ferramentas, ramais ferroviarios particulares, dársenas, peiraos de carga ou descarga para uso dela, espigóns, depósitos ou estruturas similares, flotantes ou non, necesarios para o funcionamento desa instalación.

12) *Mestura*: unha mestura ou solución composta por dúas ou máis substancias.

13) *Perigo*: a capacidade intrínseca da materia regulamentada ou dunha situación física de ocasionar danos á saúde humana ou ao ambiente.

14) *Público*: unha ou varias persoas físicas ou xurídicas e, de conformidade coas disposicións legais ou coas prácticas comúns, as asociacións, organizacións ou grupos constituídos por esas persoas.

15) *Público afectado*: para os efectos do punto 13.2, o persoal dun establecemento e a poboación do seu contorno que, de acordo cos estudos de análise de risco e consecuencias, podería sufrir sobre a súa saúde os efectos dun posible accidente grave.

16) *Público interesado*: o público que resulta ou pode resultar afectado polas decisións adoptadas sobre algún dos asuntos previstos no punto 14.1, ou que ten un interese que invocar na toma desas decisións; para os efectos desta definición, considerarase que teñen un interese as organizacións que traballen a favor da protección da saúde das persoas ou do ambiente e que cumpran os requisitos pertinentes previstos pola lexislación de aplicación.

17) *Risco*: a probabilidade de que se produza un efecto específico nun período de tempo determinado ou en circunstancias determinadas.

18) *Substancia explosiva*: toda substancia ou mestura que constitúe unha materia regulamentada, considerada no punto 2.1, incluíndo aquelas en forma de materia prima, produto, subproduto, residuo ou produto intermedio.

19) *Substancia perigosa*: toda substancia ou mestura incluída na parte 1 ou enumerada na parte 2 do anexo I do Real decreto 840/2015, do 21 de setembro, polo que se aproban medidas de control dos riscos inherentes aos accidentes graves en que interveñan substancias perigosas, incluíndo aquelas en forma de materia prima, produto, subproduto, residuo ou produto intermedio.

4. *Obrigas xerais do industrial*

Os industriais a cuxos establecementos sexa de aplicación esta instrución técnica complementaria están obrigados a:

1. Adoptar as medidas previstas nesta instrución técnica complementaria e cantas resulten necesarias para previr accidentes graves e limitar as súas consecuencias para a saúde humana, os bens e o ambiente.

2. Colaborar e demostrar ante a autoridade competente en todo momento e, especialmente, con motivo dos controis e das inspeccións a que se refire o número 19, que tomou todas as medidas necesarias previstas nesta instrución técnica complementaria.

5. *Autoridades competentes*

1. Considéranse autoridades competentes para os efectos desta instrución técnica complementaria os delegados do Goberno nas comunidades autónomas ou, de ser o caso, os subdelegados do Goberno, conforme o establecido na Lei 6/1997, do 14 de abril, de organización e funcionamento da Administración xeral do Estado, e demais normas aplicables, e a Dirección Xeral de Protección Civil e Emerxencias do Ministerio do Interior, nos termos previstos na mesma lei.

2. As autoridades competentes, en cumprimento do previsto nesta instrución técnica complementaria, actuarán de conformidade cos principios de coordinación e colaboración e velarán por que as informacións de interese obtidas en virtude desta instrución se encontren á disposición dos órganos implicados en cada caso, competentes en materia de protección civil, de prevención de riscos para a saúde humana, de protección do ambiente, de ordenación do territorio e de urbanismo e portos.

3. Para efectos desta instrución técnica complementaria, a autoridade competente aceptará a información equivalente que, en cumprimento dos números 6 ao 10 desta instrución, presenten os industriais de conformidade con outra lexislación nacional pertinente. En tales casos, a autoridade competente asegurarse de que se cumpran todos os requisitos desta instrución.

6. Notificación

1. Os industriais a cuxos establecementos lles sexa de aplicación esta instrución están obrigados a enviar unha notificación á Delegación do Goberno na comunidade autónoma ou, se é o caso, á Subdelegación do Goberno, que conteña, como mínimo, a seguinte información:

- a) Número de rexistro industrial.
- b) Nome ou razón social do industrial e enderezo completo do establecemento correspondente, teléfono e fax.
- c) Domicilio social do industrial e enderezo completo, así como teléfono e fax.
- d) Nome ou cargo do encargado do establecemento, se se trata dunha persoa diferente do industrial a que se refire a letra b), e a información necesaria para a súa localización as vinte e catro horas do día.
- e) Información suficiente para identificar as substancias perigosas de que se trate ou que poidan estar presentes, que poden ser substancias e preparados explosivos (substancias explosivas) e/ou obxectos explosivos.
- f) Cantidade máxima e forma física de cada substancia, obxecto ou artigo.
- g) Actividade exercida ou actividade prevista na instalación ou zona de almacenamento.
- h) Breve descrición dos procesos tecnolóxicos e actividades.
- i) Plano do establecemento e distribución das súas instalacións.
- j) Descrición do contorno inmediato do establecemento e factores capaces de causar un accidente grave ou de agravar as súas consecuencias, incluídos, cando estean dispoñibles, detalles dos establecementos veciños, de localizacións que queden fóra do ámbito de aplicación desta instrución técnica complementaria, zonas e obras que poidan orixinar ou incrementar o risco ou as consecuencias dun accidente grave e de efecto dominó.

2. No caso de establecementos novos, a documentación a que se refire o punto 1 remitirase xunto coa de solicitude de autorización do establecemento e evitarse a súa duplicidade.

En todos os demais casos, a notificación ou a súa actualización enviaranse á Delegación do Goberno na Comunidade Autónoma ou, se é o caso, á Subdelegación do Goberno, no prazo dun ano a partir da data de aplicación desta instrución técnica complementaria.

3. O industrial informará por anticipado a autoridade competente ante as seguintes circunstancias e procederá, de ser o caso, á actualización da notificación:

- a) Cando aumente ou diminúa significativamente a cantidade ou se modifiquen significativamente as características ou a forma física da substancia perigosa presente indicadas na notificación enviada polo industrial en virtude do punto 1 ou de que se modifiquen significativamente os procesos do seu uso, ou
- b) Cando un establecemento ou unha instalación se modifiquen de tal maneira que poida ter consecuencias importantes en termos de perigo de accidente grave, ou
- c) Cando peche definitivamente ou se desmantele o establecemento, ou
- d) Cando se produzan cambios na información a que se refiren as alíneas a), b), c) e d) do punto 1.

4. Para efectos do disposto no número 20, a Delegación de Goberno informará a Dirección Xeral de Protección Civil e Emerxencias do Ministerio do Interior destas

actualizacións, co fin de incorporar a dita información á Base Nacional de Datos de Risco Químico a que se refire o Plan estatal de protección civil ante o risco químico aprobado polo Real decreto 1070/2012, do 13 de xullo.

7. Política de prevención de accidentes graves

1. Os industriais de todos os establecementos aos cales lles sexa de aplicación esta instrución técnica complementaria deberán definir e implantar correctamente a súa política de prevención de accidentes graves, así como plasmala nun documento escrito.

A posta en práctica desta política terá por obxecto garantir un alto grao de protección da saúde humana, do ambiente e dos bens, e será proporcional aos perigos de accidente grave do establecemento. Incluirá os obxectivos xerais e os principios de actuación do industrial, a repartición de tarefas e responsabilidades de xestión, así como o compromiso de mellorar de forma permanente o control dos riscos de accidente grave e de garantir un elevado nivel de protección.

2. Este documento manterase en todo momento á disposición da Delegación do Goberno ou, se é o caso, da Subdelegación, desde as seguintes datas:

a) No caso dos establecementos novos, desde unha data razoable antes de comezar a construción ou a explotación, ou antes das modificacións que dean lugar a un cambio no inventario de substancias perigosas. Todo iso, no prazo concreto que determine o delegado do Goberno.

b) En todos os demais casos, a partir dun ano desde a data en que esta instrución técnica complementaria se aplique ao establecemento en cuestión.

3. Para os establecementos de nivel II, o documento que define a súa política de prevención de accidentes graves formará parte do informe de seguridade a que se refire o número 9.

4. Sen prexuízo do disposto no número 10, o industrial revisará periodicamente a política de prevención de accidentes graves, polo menos cada cinco anos, e actualizaraa cando sexa necesario.

5. A política de prevención de accidentes graves aplicarase mediante un sistema de xestión da seguridade a través de medios, estruturas e procedementos adecuados, de conformidade co anexo I e de forma proporcionada cos perigos do accidente grave e coa complexidade da organización ou das actividades do establecemento.

8. Efecto dominó

1. As delegacións ou subdelegacións do Goberno, utilizando a información recibida do industrial de conformidade cos números 6 e 9, ou mediante as inspeccións correspondentes, determinarán todos os establecementos de nivel I e nivel II en que a probabilidade e o risco ou as consecuencias dun accidente grave se poidan ver incrementadas debido á posición xeográfica e á proximidade con outros establecementos.

2. Cando esta autoridade competente dispoña de información adicional á facilitada polo industrial de conformidade coa alínea 6.1.j), porá esa información á disposición do dito industrial cando resulte necesaria para a aplicación deste punto.

3. As delegacións ou subdelegacións do Goberno establecerán protocolos de comunicación que aseguren que os establecementos así determinados:

a) Intercambien de xeito adecuado os datos necesarios, para posibilitar que os industriais tomen en consideración o carácter e a magnitude do risco xeral de accidente grave nas súas políticas de prevención de accidentes graves, sistemas de xestión da seguridade, informes de seguridade e plans de emerxencia interior ou autoprotección.

b) Cooperen na información á poboación e ás instalacións veciñas non incluídas no ámbito de aplicación desta instrución.

4. Os accidentes que se poidan producir por efecto dominó entre instalacións dun mesmo establecemento deberán recollerse nos informes de seguridade a que se refire o número 9.

9. Informe de seguridade

1. Os industriais dos establecementos de nivel II deben presentar un informe de seguridade á Delegación do Goberno na comunidade autónoma ou, se é o caso, á Subdelegación do Goberno, que terá por obxecto:

a) Demostrar que se estableceu unha política de prevención de accidentes graves e un sistema de xestión da seguridade para a súa aplicación de conformidade cos elementos que figuran no anexo I.

b) Demostrar que se identificaron os perigos de accidente grave e os posibles escenarios de accidente grave e que se tomaron as medidas necesarias para previlo e limitar as súas consecuencias para a saúde humana, o ambiente e os bens.

c) Demostrar que no deseño, na construción, na explotación e no mantemento de toda instalación, almacenamento, equipos e infraestrutura que estean relacionados co perigo de accidente grave no establecemento se tivo en conta unha seguridade e fiabilidade suficientes.

d) Demostrar que se elaboraron plans de emerxencia interiores e proporcionar información que permita elaborar o plan de emerxencia exterior co fin de tomar as medidas necesarias en caso de accidente grave.

e) Proporcionarlle información suficiente á autoridade competente para que poida tomar decisións en materia de implantación de novas actividades ou de execución de obras nas proximidades dos establecementos existentes.

2. O informe de seguridade conterá, como mínimo, os datos e a información que establece a Directriz básica de protección civil para o control e a planificación ante o risco de accidentes graves en que interveñen substancias perigosas, aprobada polo Real decreto 1196/2003, do 19 de setembro.

No informe de seguridade indicaranse expresamente os nomes das organizacións pertinentes que participasen na súa elaboración.

De conformidade co disposto no punto 5.3, o informe de seguridade e calquera outro estudo ou informe de natureza análoga que deban realizar os industriais, en virtude da lexislación sectorial aplicable, poderán fusionarse nun documento único, para os efectos desta epígrafe, cando esa fusión permita evitar duplicacións innecesarias da información e a repetición dos traballos realizados polo industrial ou pola autoridade competente, sempre que se cumpran todos os requisitos deste artigo e os exixidos pola lexislación sectorial que resulte aplicable. A este respecto, no caso de posibles consecuencias para o ambiente, poderanse utilizar as análises de riscos ambientais elaboradas en cumprimento da Lei 26/2007, do 23 de outubro, de responsabilidade ambiental.

3. O informe de seguridade enviarase respectando os seguintes prazos:

a) No caso de establecementos novos, remitirase xunto coa de solicitude de autorización do establecemento.

b) No caso de establecementos de nivel II existentes, antes do prazo dun ano contado desde a data de entrada en vigor desta instrución.

c) No caso dos outros establecementos, no prazo de dous anos a partir da data de aplicación desta instrución ao establecemento en cuestión.

4. Todo informe de seguridade deberá ser avaliado. Unha vez avaliado o informe de seguridade, a Delegación do Goberno na comunidade autónoma ou, de ser o caso, a Subdelegación do Goberno, pronunciarase no prazo máximo de seis meses desde a súa entrega sobre as condicións de seguridade do establecemento en materia de accidentes graves, nalgún dos seguintes sentidos:

a) Comunicaralle ao industrial as súas conclusións sobre o exame do informe de seguridade, se é o caso, logo de solicitude de información complementaria e/ou das modificacións pertinentes.

b) Prohibirá a posta en servizo ou a continuación da actividade do establecemento de que se trate, de conformidade coas facultades e cos procedementos previstos no número 18.

5. Sen prexuízo do disposto no número 10, o industrial revisará o informe de seguridade periodicamente e, se é o caso, actualizarao do seguinte xeito:

- a) Como mínimo, cada cinco anos.
- b) A raíz dun accidente grave no seu establecemento.
- c) En calquera momento, por iniciativa do industrial ou por petición da autoridade competente, cando estea xustificado por novos datos ou co fin de ter en conta os novos coñecementos técnicos sobre seguridade.

O informe de seguridade actualizado, ou as súas partes actualizadas, enviaranse sen demora á Delegación ou, de ser o caso, á Subdelegación do Goberno correspondente.

Para os efectos do disposto no número 20, a Delegación ou Subdelegación do Goberno informará a Dirección Xeral de Protección Civil e Emerxencias do Ministerio do Interior desas actualizacións, co fin de incorporar a dita información á Base Nacional de Datos de Risco Químico a que se refire o Plan estatal de protección civil ante o risco químico, aprobado polo Real decreto 1070/2012, do 13 de xullo.

A Delegación ou Subdelegación do Goberno poderá exixirlles aos industriais de establecementos de nivel I que elaboren e remitan ao dito órgano determinados aspectos do informe de seguridade que poidan resultar necesarios para o cumprimento do especificado nos números 7 e 8.

10. *Modificación dunha instalación, dun establecemento ou dunha zona de almacenamento*

1. En caso de modificación dunha instalación, dun establecemento ou parte del, ou dunha zona de almacenamento, incluídas as características ou a forma física ou as cantidades de substancias perigosas que poidan ter consecuencias importantes polo que respecta ao perigo de accidente grave ou que poidan dar lugar a que un establecemento de nivel I pase a ser de nivel II ou viceversa, o industrial debe revisar e actualizar, de ser o caso, a notificación, a política de prevención de accidentes graves, o sistema de xestión da seguridade, o informe de seguridade, así como o Plan de emerxencia interior ou autoprotección, e informar a Delegación ou a Subdelegación do Goberno sobre as esas actualizacións antes de proceder a esa modificación.

2. Para efectos do disposto no número 20, a Delegación ou a Subdelegación do Goberno informará desas actualizacións o órgano competente en materia de protección civil da comunidade autónoma onde radique o establecemento e a Dirección Xeral de Protección Civil e Emerxencias do Ministerio do Interior, co fin de incorporar a dita información á Base Nacional de Datos de Risco Químico a que se refire o Plan estatal de protección civil ante o risco químico, aprobado polo Real decreto 1070/2012, do 13 de xullo.

11. *Plans de emerxencia interior ou de autoprotección*

1. O industrial a cuxo establecemento lle sexa de aplicación esta instrución técnica complementaria deberá elaborar un plan de emerxencia interior ou de autoprotección no cal se defina a organización e o conxunto de medios e procedementos de actuación, co fin de previr os accidentes de calquera tipo e, se é o caso, limitar os efectos no interior do establecemento.

O seu contido axustarase ao especificado na Directriz básica de protección civil para o control e planificación ante o risco de accidentes graves en que interveñen substancias perigosas e á lexislación sobre autoprotección. Elaborarase logo de consulta co persoal do

establecemento e cos traballadores de empresas subcontratadas ou subcontratistas a longo prazo, cumprindo, en todo caso, o disposto no artigo 18, relativo á información, consulta e participación dos traballadores, da Lei 31/1995, do 8 de novembro, de prevención de riscos laborais.

No marco das obrigas derivadas da coordinación de actividades empresariais a que se refire o artigo 24 da citada Lei 31/1995, do 8 de novembro, de prevención de riscos laborais, desenvolvido polo Real decreto 171/2004, do 30 de xaneiro, en materia de coordinación de actividades empresariais, o empresario titular do establecemento deberá informar aquelas empresas subcontratadas e autónomos que desenvolvan a súa actividade no dito establecemento do contido do Plan de emerxencia interior ou de autoprotección, e todos eles deberán cumprir co deber de cooperación e coas demais obrigas establecidas no citado real decreto.

2. Este plan de emerxencia interior ou de autoprotección será remitido á Delegación do Goberno na comunidade autónoma ou, de ser o caso, á Subdelegación do Goberno.

3. Os prazos para a súa presentación serán:

a) Para os novos establecementos, antes de que se inicie a súa explotación ou antes das modificacións que dean lugar a un cambio no inventario de substancias perigosas; todo iso no prazo establecido polo órgano competente.

b) Para os establecementos existentes, como moi tarde o 1 de xuño de 2016, non sendo que o plan elaborado antes desa data e a información contida nel se atean xa ao disposto nesta epígrafe e non mudasen.

c) Para os demais establecementos, no prazo de dous anos a partir da data en que esta instrución técnica complementaria se aplique ao establecemento en cuestión.

4. A Delegación ou Subdelegación do Goberno remitiralle ao órgano competente en materia de protección civil da comunidade autónoma o Plan de emerxencia interior ou autoprotección referido no número 1, a notificación indicada no número 6 e o informe de seguridade referido no número 9, así como as súas posteriores actualizacións.

5. Informarase o órgano competente en materia de protección da comunidade autónoma do resultado dos exercicios e simulacros realizados, así como da data de realización.

A revisión regulamentaria dos plans de emerxencia interior ou de autoprotección realizarase a intervalos apropiados que non deberán superar os tres anos e terá en conta tanto os cambios que se producen nos establecementos correspondentes como na organización dos servizos de emerxencia chamados a intervir, así como os novos coñecementos técnicos e os coñecementos sobre as medidas que deban tomar en caso de accidente grave.

12. *Planificación da ocupación do solo*

1. As delegacións e subdelegacións do Goberno establecerán, no desempeño das funcións atribuídas nesta instrución, os procesos de información que sexan necesarios en relación coas autoridades competentes en materia de planificación da ocupación do solo, de conformidade cos principios de coordinación, colaboración e consulta adecuados. Os procedementos serán tales que, no momento de tomar as decisións, as autoridades competentes dispoñan de suficiente información sobre os riscos vinculados ao establecemento que sexa relevante para a planificación da ocupación do solo.

2. En todo caso, eses procesos estarán referidos:

a) Á localización dos establecementos novos.

b) Ás modificacións dos establecementos recollidas no número 10.

c) Ás novas obras de titularidade estatal, cando a situación ou as obras executadas poidan orixinar ou aumentar o risco ou as consecuencias dun accidente grave.

3. Para os efectos previstos no número 1, os industriais facilitaranlles ás delegacións ou, de ser o caso, ás subdelegacións do Goberno, por instancias delas, a información

sobre os riscos vinculados ao establecemento que sexa necesaria para os efectos de planificación da ocupación do solo.

13. Información ao público

1. A Delegación do Goberno na comunidade autónoma ou, se é o caso, a Subdelegación do Goberno porá á disposición do público de forma permanente, e tamén en formato electrónico, a información mencionada no anexo II. A información actualizarase cando resulte necesario, tamén con motivo das modificacións consideradas no número 10.

2. Así mesmo, asegurárase tamén:

a) De que o informe de seguridade estea á disposición do público cando se solicite, sen prexuízo do disposto no punto 21.3. Para estes efectos, porase á disposición do público un informe modificado, por exemplo en forma de resumo non técnico, que incluíra información xeral sobre os perigos de accidente grave e os seus efectos potenciais para a saúde humana, os bens e o ambiente en caso de accidente grave.

b) De que o inventario dos produtos regulamentados estea á disposición do público cando se solicite, sen prexuízo do disposto no punto 21.3.

c) De que todas as persoas que se poidan ver afectadas por un accidente grave recibirán periodicamente, polo medio máis adecuado e sen que teñan que solicitala, información clara e comprensible sobre as medidas de seguridade e o comportamento que se debe adoptar en caso de accidente grave.

14. Consulta pública e participación na toma de decisións

1. Ademais do establecido neste regulamento respecto das autorizacións de fábricas e depósitos, a Delegación do Goberno na comunidade autónoma ou, de ser o caso, a Subdelegación do Goberno someterá ao trámite de información pública, con carácter previo á súa aprobación ou autorización, os proxectos concretos relativos a:

a) Proxectos de novos establecementos de conformidade co número 12 desta instrución técnica complementaria.

b) Proxectos de modificación de establecementos a que se refire o número 10, cando estean suxeitos aos requisitos do número 12 desta instrución técnica complementaria.

c) Proxectos de obra ou edificacións estatais, é dicir, aqueles cuxa autorización é de competencia estatal, nas inmediacións dos establecementos xa existentes, cando a situación ou as obras executadas poidan aumentar o risco ou as consecuencias dun accidente grave de conformidade co número 12.

2. Para iso, a Delegación do Goberno na comunidade autónoma ou, se é o caso, a Subdelegación do Goberno informará o público, mediante anuncio publicado no boletín oficial correspondente durante polo menos 15 días hábiles, dos seguintes asuntos:

a) Do obxecto do proxecto concreto,

b) Cando proceda, da circunstancia de que un proxecto está suxeito a unha avaliación de impacto ambiental ou a consultas entre os Estados membros,

c) Dos datos da autoridade competente de tomar a decisión, dos cales se poida obter información pertinente e aos cales se poidan presentar observacións ou formular preguntas, así como os prazos para iso,

d) Dunha indicación das datas e dos lugares en que se facilitará a información pertinente, así como dos medios empregados para iso,

e) Das modalidades de participación do público definidas conforme o número 6 desta epígrafe.

3. En relación cos proxectos concretos a que se refire o número 1, poranse á disposición do público interesado os seguintes elementos:

a) Os principais informes e ditames remitidos á autoridade competente no momento en que se informou o público conforme o número 2.

b) Toda a información que non sexa a referida no número 2 deste punto que resulte pertinente para a decisión de que se trate e que só se poida obter despois de que se informase o público conforme o citado número.

O público interesado consultado deberá pronunciarse no prazo máximo de 30 días naturais desde a recepción da solicitude de participación. Unha vez transcorrido ese prazo sen que se reciba o pronunciamento, o procedemento continuará.

4. Cando tomen as decisións pertinentes, en cuxa adopción se terán debidamente en conta os resultados das consultas mantidas, a Delegación do Goberno na comunidade autónoma ou, de ser o caso, a Subdelegación do Goberno informará e porá á disposición do público, mediante avisos públicos ou outros medios apropiados como os electrónicos, cando se dispoña deles, e no prazo de tres meses contados dese a recepción da notificación e dos documentos que se lle deben xuntar:

a) Do contido da decisión e das razóns que a xustifican, incluídas, se é o caso, as posteriores actualizacións,

b) Dos resultados das consultas realizadas antes de tomar a decisión e unha explicación de como se tiveron en conta para chegar a ela.

5. Para que o público interesado teña a posibilidade desde unha fase temperá de dar o seu parecer sobre proxectos relativos aos asuntos mencionados no número 1, alíneas a) ou c):

a) A autoridade competente consultará o público interesado e porá á súa disposición o borrador do proxecto.

b) O público interesado consultado deberá pronunciarse no prazo máximo de corenta e cinco días hábiles desde a recepción do borrador. Unha vez transcorrido ese prazo sen que se reciba o pronunciamento, o procedemento continuará.

c) A autoridade competente tomará a decisión correspondente no prazo de catro meses desde o inicio do proceso de consultas.

A Delegación do Goberno na comunidade autónoma ou, de ser o caso, a Subdelegación do Goberno determinará qué público ten dereito de participación para os efectos deste punto, incluídas as organizacións non correspondentes que reúnan os requisitos pertinentes impostos pola lexislación nacional, tales como as que traballan pola protección do ambiente.

Este punto non se aplicará aos proxectos para os cales se leve a cabo un procedemento de participación conforme a Lei 21/2013, do 9 de decembro, de avaliación ambiental.

15. Información que deberá facilitar o industrial en caso de accidente grave

1. Unha vez concluída a situación de emerxencia producida por un accidente grave, o industrial deberá remitir á Delegación do Goberno na comunidade autónoma ou, de ser o caso, á Subdelegación do Goberno información detallada sobre:

a) As causas e os efectos producidos a consecuencia do accidente.

b) As medidas previstas para:

i. Mitigar os efectos do accidente a medio e longo prazo.

ii. Evitar que se produzan accidentes similares, sobre a base das experiencias adquiridas.

Esa información deberá ser actualizada en caso de que investigacións máis rigorosas poñan de manifesto novos feitos que modifiquen a dita información ou as conclusións que dimanen dela.

2. A citada información será remitida pola Delegación do Goberno na comunidade autónoma ou, se é o caso, pola Subdelegación do Goberno á comunidade autónoma correspondente.

16. *Medidas que deberá adoptar a autoridade competente despois dun accidente grave*

Unha vez concluída a situación de emerxencia por un accidente grave, a Delegación do Goberno na comunidade autónoma ou, de ser o caso, a Subdelegación do Goberno deberá:

- i. Asegurarse de que se adopten as medidas a medio e longo prazo que sexan necesarias.
- ii. Recoller, mediante inspección, investigación ou outros medios adecuados, a información necesaria para unha análise completa do accidente nos aspectos técnicos, de organización e de xestión.
- iii. Dispor o necesario para que o industrial tome as medidas paliativas necesarias.
- iv. Formular recomendacións sobre futuras medidas de prevención.

17. *Información que a autoridade competente facilitará en caso de accidente grave*

1. As delegacións do Goberno remitirán á Dirección Xeral de Protección Civil e Emerxencias do Ministerio do Interior, tan axiña como sexa posible e, como moi tarde, dous meses despois da data do accidente, a información dos accidentes graves que acontezan no seu territorio. Todo iso co obxecto de ser incorporado á Base Nacional de Datos de Risco Químico. Para aqueles que respondan aos criterios do anexo III desta instrución técnica complementaria, esta información conterá, como mínimo, os seguintes datos:

- i. Nome e enderezo da autoridade encargada de elaborar o informe,
 - ii. Data, hora e lugar do accidente, nome completo do industrial e enderezo do establecemento de que se trate,
 - iii. Unha breve descrición das circunstancias do accidente, con indicación das materias regulamentadas involucradas e dos efectos inmediatos na saúde humana e no ambiente,
 - iv. Unha breve descrición das medidas de emerxencia adoptadas e das precaucións inmediatas necesarias para evitar a repetición do accidente,
 - v. Os resultados das súas investigacións sobre o accidente e as recomendacións.
- Esta información poderase atrasar co fin de posibilitar a conclusión de procedementos xudiciais, en caso de que a dita comunicación poida afectar tales procedementos.

2. Para o cumprimento do indicado neste punto, acordaranse no seo da Comisión Nacional de Protección Civil os formatos normalizados correspondentes, seguindo os criterios aconsellados pola Comisión Europea.

18. *Prohibición de explotación*

1. A Delegación do Goberno na comunidade autónoma ou, de ser o caso, a Subdelegación do Goberno prohibirá a explotación ou a entrada en servizo de calquera establecemento, instalación ou zona de almacenamento, ou calquera parte deles, cando as medidas adoptadas polo titular para a prevención e a redución dos accidentes graves se consideren, de xeito xustificado, manifestamente insuficientes.

En particular, terán en conta os casos graves en que non se adoptasen as medidas necesarias mencionadas no informe de inspección.

2. A Delegación do Goberno na comunidade autónoma ou, se é o caso, a Subdelegación do Goberno poderá prohibir a explotación ou a entrada en servizo de todo establecemento, instalación ou zona de almacenamento, ou de calquera parte deles, se o

industrial non presentou a notificación, os informes ou outra información exixida por esta instrución técnica complementaria dentro do prazo establecido.

3. A Delegación do Goberno na comunidade autónoma ou, de ser o caso, a Subdelegación do Goberno informará o órgano competente en materia de protección civil da comunidade autónoma e a Comisión Nacional de Protección Civil, a través da Dirección Xeral de Protección Civil e Emerxencias do Ministerio do Interior, das decisións adoptadas segundo o disposto nos números 1 e 2 deste punto.

4. Ante as prohibicións dos números 1 e 2, o industrial afectado poderá interpor recurso, de conformidade co previsto na Lei 30/1992, do 26 de novembro, de réxime xurídico das administracións públicas e do procedemento administrativo común.

19. Inspeccións

1. As áreas funcionais e dependencias de industria e enerxía das delegacións e subdelegacións do Goberno establecerán un sistema de inspeccións e as medidas de control adecuadas a cada tipo de establecemento.

2. Estas inspeccións serán adecuadas para o tipo de establecemento de que se trate, non dependerán da recepción do informe de seguridade nin de ningún outro informe presentado e posibilitarán un exame planificado e sistemático dos equipamentos técnicos, de organización e de modos de xestión aplicados no establecemento, co fin de que o industrial poida demostrar, en particular:

- a) Que tomou as medidas adecuadas, tendo en conta as actividades do establecemento, para previr accidentes graves,
- b) Que tomou as medidas adecuadas para limitar as consecuencias de accidentes graves dentro e fóra do establecemento,
- c) Que os datos e a información facilitados no informe de seguridade ou noutro dos informes presentados reflectan fielmente o estado de seguridade do establecemento,
- d) Que estableceu programas e informou o persoal do establecemento sobre as medidas de protección e actuación en caso de accidente,
- e) Que se facilita ao público a información que estipula o número 14.

3. Todos os establecementos deben estar cubertos por un plan de inspección, que será revisado e actualizado periodicamente, cando proceda, polas áreas funcionais e dependencias de industria e enerxía das delegacións e subdelegacións do Goberno.

Os plans de inspección incluirán o seguinte:

- a) Unha valoración xeral das cuestións de seguridade pertinentes,
- b) A zona xeográfica cuberta polo plan de inspección,
- c) Unha lista dos establecementos cubertos polo plan,
- d) Unha lista dos grupos de establecementos con posible efecto dominó segundo o número 8,
- e) Unha lista dos establecementos en que fontes de perigo ou riscos externos concretos poidan aumentar a probabilidade ou as consecuencias dun accidente grave,
- f) Os procedementos para as inspeccións rutineiras, incluídos os programas para esas inspeccións de conformidade co número 4,
- g) Os procedementos das inspeccións non rutineiras indicadas no número 6,
- h) As disposicións sobre a cooperación entre as diferentes autoridades responsables das inspeccións.

4. Baseándose nos plans de inspección mencionados no número 3, a autoridade competente elaborará periodicamente programas de inspección de rutina para todos os establecementos, estes incluirán a frecuencia das visitas *in situ* para os distintos tipos de establecementos.

O período entre dúas visitas *in situ* consecutivas non excederá un ano, para os establecementos de nivel II, e tres, para os de nivel I, non sendo que se elaborase un

programa de inspeccións baseado nunha valoración sistemática dos perigos de accidente grave dos establecementos de que se trate.

Esta avaliación sistemática dos perigos dos establecementos de que se trate basearase polo menos nos seguintes criterios:

- a) A repercusión posible dos establecementos correspondentes sobre a saúde humana e o ambiente,
- b) O historial de cumprimento dos requisitos desta instrución técnica complementaria.

Cando proceda, teranse en conta tamén as conclusións pertinentes de inspeccións realizadas conforme outras normativas.

5. As inspeccións non rutineiras levaranse a cabo para investigar, o antes posible, denuncias graves, accidentes graves e conatos de accidente, incidentes e casos de incumprimento.

6. No prazo dos catro meses seguintes a cada inspección, a autoridade competente comunicarlle ao industrial as conclusións da inspección e todas as actuacións que se consideren necesarias. A área funcional ou dependencia de industria e enerxía da delegación ou subdelegación do Goberno correspondente asegurárase de que o industrial realice todas esas actuacións necesarias nun período razoable tras recibir a comunicación.

Se nunha inspección se detectou un caso importante de incumprimento desta instrución técnica complementaria, levarase a cabo outra inspección no prazo de seis meses.

A Delegación do Goberno na comunidade autónoma ou, de ser o caso, a Subdelegación do Goberno porá en coñecemento do órgano competente en materia de protección civil da comunidade autónoma, mediante informe anual elaborado para tal fin, os resultados e as circunstancias que concorreron nas inspeccións realizadas.

Cando sexa posible e proceda, as inspeccións coordinaranse coas levadas a cabo conforme outras normativas.

7. Para efectos do disposto no número 20, a correspondente Delegación ou Subdelegación do Goberno informará a Dirección Xeral de Protección Civil e Emerxencias do Ministerio do Interior desas inspeccións, co fin de incorporar a información a que se refire o número 2 desta epígrafe á Base Nacional de Datos de Risco Químico descrita no Plan estatal de protección civil ante o risco químico, aprobado polo Real decreto 1070/2012, do 13 de xullo.

8. A Dirección Xeral de Protección Civil e Emerxencias do Ministerio do Interior establecerá mecanismos e instrumentos para intercambiar experiencias e consolidar os coñecementos entre as autoridades competentes e para que participen neses mecanismos no ámbito da Unión Europea cando sexa procedente.

9. Os industriais deben prestar á autoridade competente toda a asistencia que sexa necesaria para que esta poida levar a cabo as inspeccións e reunir a información precisa para o desempeño das súas obrigas para os efectos desta instrución técnica complementaria, en particular para que as autoridades poidan avaliar exhaustivamente a posibilidade dun accidente grave e determinar as posibilidades de que aumente a probabilidade ou a gravidade dos accidentes graves, preparar un plan de emerxencia exterior e ter en conta substancias que, pola súa forma física, as súas condicións particulares ou a súa situación, poidan exixir unha consideración adicional.

20. Intercambios e sistema de información

1. A Dirección Xeral de Política Enerxética e Minas do Ministerio de Industria, Enerxía e Turismo, a través da Dirección Xeral de Coordinación da Administración Periférica do Estado, velará por que as áreas funcionais e dependencias de industria e enerxía das delegacións e subdelegacións do Goberno se intercambien información sobre a experiencia adquirida en materia de prevención de accidentes graves e de limitación das súas consecuencias, e se consoliden os coñecementos entre elas. A dita información

versará fundamentalmente sobre o funcionamento das medidas previstas nesta instrución técnica complementaria.

2. A Dirección Xeral de Protección Civil e Emerxencias do Ministerio do Interior administrará e manterá operativa e á disposición dos órganos administrativos competentes a Base Nacional de Datos sobre Risco Químico, con información sobre os establecementos recollidos nesta instrución técnica complementaria.

3. Para facilitar o cumprimento do disposto no punto 13.1, a Dirección Xeral de Protección Civil e Emerxencias do Ministerio do Interior permitirá, a través da súa páxina web, se a Delegación de Goberno na comunidade autónoma onde radiquen os establecementos así o considera, pór á disposición do público os datos do anexo II non considerados confidenciais de acordo co número 21.

21. Acceso á información e confidencialidade

1. En prol da maior transparencia, a autoridade competente deberá pór a información recibida en aplicación desta instrución técnica complementaria á disposición de calquera persoa física ou xurídica que o solicite, nos termos previstos na Lei 27/2006, do 18 de xullo, pola que se regulan os dereitos de acceso á información, de participación pública e de acceso á xustiza en materia de ambiente.

2. A divulgación de información exixida en virtude desta instrución técnica complementaria, incluída aquela en virtude do número 13, poderá ser rexeitada ou restrinxida pola autoridade competente cando se cumpran as condicións establecidas no artigo 13 da Lei 27/2006, do 18 de xullo.

3. A divulgación da información completa a que se fai referencia no punto 13.2, alíneas a) e b), que conste en poder da autoridade competente en cada caso, poderá ser denegada por esta, sen prexuízo do disposto no punto 2 deste artigo, se o industrial pediu que non se revelen determinadas partes do informe de seguridade ou o inventario de substancias perigosas polas razóns previstas no artigo 13 da Lei 27/2006, do 18 de xullo.

A autoridade competente en cada caso poderá decidir tamén, polas mesmas razóns, que determinadas partes do informe ou do inventario non se revelen. Nestes casos, e logo de acordo da dita autoridade competente, o industrial proporcionarlle un informe ou un inventario modificados dos cales se exclúan esas partes.

22. Acceso á xustiza

1. Todo solicitante que pida información conforme o punto 13.2, alíneas a) ou b), ou o punto 21.1 desta instrución técnica complementaria pode interpor os recursos administrativos regulados no título VII da Lei 30/1992, do 26 de novembro, de réxime xurídico das administracións públicas e do procedemento administrativo común, e demais normativa aplicable e, de ser o caso, o recurso contencioso-administrativo previsto na Lei 29/1998, do 13 de xullo, reguladora da xurisdición contencioso-administrativa.

2. O público interesado, nos casos a que se aplica o punto 14.1 desta instrución, poderá presentar os recursos administrativos regulados no título VII da Lei 30/1992, do 26 de novembro, de réxime xurídico das administracións públicas e do procedemento administrativo común, así como na Lei 27/2006, do 18 de xullo, pola que se regulan os dereitos de acceso á información, de participación pública e de acceso á xustiza en materia de ambiente, e demais normativa aplicable e, se é o caso, o recurso contencioso-administrativo previsto na Lei 29/1998, do 13 de xullo, reguladora da xurisdición contencioso-administrativa.

23. Sancións

O incumprimento do establecido nesta instrución técnica complementaria será cualificado e sancionado de conformidade co disposto no título IX do Regulamento de explosivos, aprobado polo Real decreto 230/1998, do 16 de febreiro.

ANEXO I

Información considerada no número 7.5 e no número 9 relativa ao sistema de xestión da seguridade e á organización do establecemento con miras á prevención de accidentes graves

Para a aplicación do sistema de xestión da seguridade elaborado polo industrial teranse en conta os elementos que figuran a seguir:

a) O sistema de xestión da seguridade será proporcionado aos perigos, ás actividades industriais e á complexidade da organización existente no establecemento, e estará baseado nunha avaliación dos riscos. Debería integrar a parte do sistema de xestión xeral que inclúe a estrutura organizativa, as responsabilidades, as prácticas, os procedementos, os procesos e os recursos que permiten definir e aplicar a política de prevención de accidentes graves;

b) Abordaranse os seguintes aspectos no marco do sistema de xestión da seguridade:

i. A organización e o persoal: as funcións e responsabilidades do persoal asociado á xestión dos riscos de accidente grave en todos os niveis de organización, xunto coas medidas adoptadas para sensibilizar sobre a necesidade de mellora permanente; a determinación das necesidades de formación do dito persoal e a organización desa formación, e a participación dos empregados e do persoal subcontratado que traballen no establecemento que sexa importante desde o punto de vista da seguridade,

ii. A identificación e a avaliación dos riscos de accidente grave: a adopción e a aplicación de procedementos para a identificación sistemática dos riscos de accidente grave que se poidan producir en caso de funcionamento normal ou anormal, incluídas, cando procedan, as actividades subcontratadas, así como a avaliación da súa probabilidade e da súa gravidade,

iii. O control de explotación: a adopción e a aplicación de procedementos e instrucións para o funcionamento en condicións seguras, tamén incluídos o mantemento das instalacións, os procedementos e o equipamento, e para a xestión das alarmas e das paradas temporais, tendo en conta a información dispoñible sobre mellores prácticas en materia de seguimento e control, con vistas a reducir o risco de fallo dos sistemas; a xestión e o control dos riscos asociados ao envellecemento dos equipamentos da instalación e á corrosión: inventario dos equipamentos, estratexia e metodoloxía do establecemento en materia de seguimento e control do estado dos equipamentos, medidas de seguimento adecuadas e contramedidas necesarias,

iv. A xestión das modificacións: a adopción e aplicación de procedementos para a planificación das modificacións que se deban efectuar nas instalacións, nos procesos ou nas zonas de almacenamento existentes ou para o deseño doutros novos,

v. A planificación das situacións de emerxencia: a adopción e aplicación de procedementos destinados a identificar as emerxencias previsibles mediante unha análise sistemática, así como a elaborar, probar e revisar os plans para facer fronte a tales situacións de emerxencia e a proporcionar formación específica ao persoal interesado; esta formación impartirase a todo o persoal que traballe no establecemento, incluído o persoal subcontratado pertinente,

vi. O seguimento do funcionamento: a adopción e aplicación de procedementos para a avaliación permanente do cumprimento dos obxectivos fixados polo industrial no marco da súa política de prevención de accidentes graves e do seu sistema de xestión da seguridade, e a implantación de mecanismos de investigación e de corrección en caso de incumprimento; os procedementos deberán abranguer o sistema do industrial para a notificación de accidentes graves ou conatos de accidente, en especial cando se produzan fallos das medidas de protección; a investigación realizada ao respecto e a actuación consecutiva baseadas na experiencia adquirida; os procedementos poderían incluír tamén indicadores de funcionamento, tales como os indicadores do funcionamento en materia de seguridade ou outros indicadores pertinentes,

vii. A auditoría e a análise: a adopción e aplicación de procedementos para a avaliación periódica sistemática da política de prevención de accidentes graves e da eficacia e idoneidade do sistema de xestión da seguridade; a análise documentada pola dirección do funcionamento da política aplicada, do sistema de xestión da seguridade e da súa actualización, incluída a consideración e incorporación dos cambios sinalados como necesarios no exercicio de auditoría e a análise.

ANEXO II

Información que deberá facilitarse á poboación en aplicación do punto 13.1

Parte 1. Para todos os establecementos

1. Nome ou razón social do industrial e enderezo completo do establecemento correspondente.
2. Confirmación de que o establecemento cumpre o establecido nesta instrución técnica complementaria.
3. Explicación en termos sinxelos da actividade ou actividades levadas a cabo no establecemento.
4. Os nomes comúns ou os nomes xenéricos ou a clasificación de perigosidade dos produtos regulamentados existentes no establecemento que poidan dar lugar a un accidente grave, indicando as súas principais características perigosas, en termos sinxelos.
5. Información xeral sobre o modo en que se avisará o público interesado, en caso necesario; información adecuada sobre o comportamento apropiado en caso de accidente grave ou indicación de onde se pode acceder a esta información en forma electrónica.
6. A data da última inspección realizada pola autoridade competente.
7. Información detallada sobre o modo de conseguir maior información ao respecto, sen prexuízo dos requisitos establecidos no número 21.

Parte 2. Para os establecementos de nivel II, ademais da información mencionada na parte 1 deste anexo

1. Información xeral sobre a natureza dos perigos de accidente grave, incluídos os seus efectos potenciais para a saúde humana e o ambiente e resumo dos principais tipos de escenarios de accidente grave e das medidas de control adoptadas en previsión deles.
2. Confirmación de que o industrial está obrigado a tomar as medidas adecuadas no lugar, incluído o contacto cos servizos de emerxencia, co fin de actuar en caso de accidente grave e reducir ao mínimo os seus efectos.
3. Información adecuada do plan de emerxencia exterior elaborado para facer fronte aos efectos que un accidente poida ter fóra da localización onde aconteza. Deberanse incluír chamamentos á cooperación, con instrucións ou consignas formuladas polos servizos de emerxencia no momento do accidente.
4. Cando proceda, indicación de se o establecemento está preto do territorio doutro Estado membro e de se existe a posibilidade de que un accidente grave teña efectos transfronteirizos, de conformidade co Convenio sobre os efectos transfronteirizos dos accidentes industriais da Comisión Económica para Europa das Nacións Unidas (CEPE).

ANEXO III

Criteria para a notificación dun accidente grave á Comisión Europea de acordo co establecido no número 16

A. A Dirección Xeral de Protección Civil e Emerxencias do Ministerio do Interior notificaralle á Comisión Europea todo accidente que se axuste á descrición do número 1

ou que teña polo menos unha das consecuencias descritas nos números 2, 3, 4 e 5 sinalados a seguir:

1. Substancias que interveñen: calquera incendio ou explosión ou liberación accidental dunha substancia perigosa en que interveña unha cantidade non inferior ao 5 por cento da cantidade considerada como limiar na columna II do número 1.

2. Prexuízos ás persoas ou aos bens: accidente no cal estea directamente implicada unha substancia perigosa e que dea orixe a algún dos feitos seguintes:

- i. Unha morte.
- ii. Seis persoas feridas dentro do establecemento que requiran hospitalización durante 24 horas ou máis.
- iii. Unha persoa situada fóra do establecemento que requira hospitalización durante 24 horas ou máis.
- iv. Vivenda(s) situada(s) fóra do establecemento danada(s) e inutilizable(s) a causa do accidente.
- v. Evacuación ou confinamento de persoas durante máis de 2 horas [(persoas x horas): o produto é igual ou superior a 500].
- vi. Interrupción dos servizos de auga potable, electricidade, gas ou teléfono durante máis de 2 horas [(persoas x horas): o produto é igual ou superior a 1000].

3. Prexuízos directos ao ambiente:

- a) Danos permanentes ou a longo prazo causados a hábitats terrestres:
 - i. 0,5 ha ou máis dun hábitat importante desde o punto de vista do ambiente ou da conservación e protexido pola lei,
 - ii. 10 ha ou máis dun hábitat máis estendido, incluídas terras de labor;
- b) Danos significativos ou a longo prazo causados a hábitats de auga doce ou mariños:
 - i. 10 km ou máis dun río ou canle,
 - ii. 1 ha ou máis dun lago ou estanque,
 - iii. 2 ha ou máis dun delta,
 - iv. 2 ha ou máis dunha zona costeira ou marítima;
- c) Danos significativos causados a un acuífero ou a augas subterráneas:

1 ha ou máis.

4. Danos materiais:

- i. Danos materiais no establecemento: a partir de 2 millóns de euros.
- ii. Danos materiais fóra do establecemento: a partir de 0,5 millóns de euros.

5. Danos transfronteirizos: calquera accidente en que interveña directamente unha substancia perigosa e que dea orixe a efectos fóra do territorio español.

B. Deberán notificarse á Comisión Europea os accidentes e os accidentes evitados por escasa marxe que, a xuízo da Delegación do Goberno, presenten un interese especial desde o punto de vista técnico para a prevención de accidentes graves e para limitar as súas consecuencias e que non cumpran os criterios cuantitativos citados anteriormente na alínea a).

Disposición transitoria única. *Vixencia da normativa anterior.*

Os puntos 1 e 2 do número 6 da Instrución técnica complementaria número 10 do Regulamento de explosivos, aprobado polo Real decreto 230/1998, do 16 de febreiro, non se aplicarán se, na data de entrada en vigor desta orde, o industrial xa lle enviou unha notificación á autoridade competente en cumprimento dos requisitos da normativa anterior

e a información contida na dita notificación cumpre o disposto no punto 1 do número 6 e non mudou.

O punto 1 do número 7 da Instrución técnica complementaria número 10 do Regulamento de explosivos, aprobado polo Real decreto 230/1998, do 16 de febreiro, non se aplicará se o industrial estableceu e implantou xa a súa política de prevención de accidentes graves en cumprimento dos requisitos da normativa anterior, con anterioridade á entrada en vigor desta orde, e a información contida nela cumpre o disposto no punto 1 do número 7 e non mudou.

Os puntos 1, 2 e 3 do número 9 da Instrución técnica complementaria número 10 do Regulamento de explosivos, aprobado polo Real decreto 230/1998, do 16 de febreiro, non se aplicarán se o industrial xa enviou o informe de seguridade, en cumprimento dos requisitos da normativa anterior, antes da data de entrada en vigor desta orde, e a información contida nel cumpre o disposto nos puntos 1 e 2 e non mudou. Co obxecto de dar cumprimento aos puntos 1 e 2 do número 9, o industrial presentará todas as partes modificadas do informe de seguridade na forma prescrita pola autoridade competente nos prazos mencionados no punto 3 do citado número.

Disposición derogatoria única. *Derrogación normativa.*

Quedan derogadas cantas disposicións de igual ou inferior rango se opoñan ao establecido nesta orde e, en todo caso, a actualización da Instrución técnica complementaria número 10 «Prevención de accidentes graves» do Regulamento de explosivos, efectuada pola Orde PRE/252/2006, do 6 de febreiro.

Disposición derradeira primeira. *Incorporación de normas do dereito da Unión Europea.*

Mediante esta orde incorpórase ao ordenamento xurídico español, para o ámbito material regulado pola Instrución técnica complementaria número 10 «Prevención de accidentes graves» do Regulamento de explosivos, aprobado polo Real decreto 230/1998, do 16 de febreiro, a Directiva 2012/18/UE do Parlamento Europeo e do Consello, do 4 de xullo de 2012, relativa ao control dos riscos inherentes aos accidentes graves en que interveñan substancias perigosas e pola que se modifica e posteriormente se derroga a Directiva 96/82/CE, no ámbito de aplicación do Regulamento de explosivos.

Disposición derradeira segunda. *Entrada en vigor.*

Esta orde entrará en vigor o día seguinte ao da súa publicación no «Boletín Oficial del Estado».

Madrid, 20 de novembro de 2015.—A vicepresidenta do Goberno e ministra da Presidencia, Soraya Sáenz de Santamaría Antón.